

4. maj 2015

**Nunat Avannarliit Killiit Siunnersuisoqatigiiffiata kaammattuutitut aalajangersagaata Inatsisartunit ilalerneqarneranik Inatsisartut aalajangiiffigisassaattut siunnersuut:**

**Nunat Avannarliit Killiit Siunnersuisoqatigiiffiata Savalimmiuni naalakkersuisut, Kalaallit Nunaanni Naalakkersuisut Islandimilu naalakkersuisut kaammattorpaat Nunat Avannarliit Killiit Siunnersuisoqatigiiffianut qinikkatut ilaasortat, Siunnersuisoqatigiiffimmut nalunaarutit tunngavigalugit, allatigulluunniit isumaqarfigisaminnik nunat avannarliit killiit suleqatigiinnerisut tunngasunik, nunat ilasortaasut naalakkersuisuinut apeqquteqarsinnaaleqqullugit. Apeqqutit Nunat Avannarliit Killiit Siunnersuisoqatigiiffiata allattoqarfianut nassiu-neqartassapput, tassangaanniillu naalakkersuisunut pineqartunut ingerlateqqinneqarlutik. Naalakkersuisut pisussaapput ilaasortamit apeqqutigineqartumut, kingusinnerpaamik apeqquteqarfigineqartup apeqqummik tigusineraniit sapaatit akunnerini arfineq pingasut qaangi-utsinnagit, akissuteqarnissamut.**

(Aallartitat siulittaasuat Lars Emil Johansen)

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu Naalakkersuisunut kaammattuutaat nunat pineqartut akornanni Nunat Avannarliit Killiit Siunnersuisoqatigiiffianut qinikkatut ilaasortat nunat ilaasortaasut Naalakkersuisuinut apeqquteqarsinnaalernissaannut sammititaq Siumumiit imaattumik oqaaseqarfigisavarput.

Nunat Avannarliit Killiit Siunnersuisoqatigiiffiata 2014-imi Islandimi ukiumoortumik ataatsimiinnermini aalajangiussaasa ilagaat Siunnersuisoqatigiinni ilaasortat qinikkat akunnerminni Naalakkersuisuminnut tunngasunik apeqquteqaateqarsinnaanissaat periarfissarsiuunneqassasoq Nunat Avannarliit Killiit akornanni suleqatigiinneq siuarsarneqarsinnaaqqullugu. Siumumiit erseqqissaatigisavarput nunap allap Inatsisartuisa nunaginngisap Naalakkersuisuinut nunap pineqartup inatsisartui avaqqutiinnarlugit apeqquteqarsinnaanngortinnissaat eqqarsarnartoqartikkatsigu, nunat tamalaat akornanni ataqqeqatigiinneq eqqarsaatigalugu apeqquteqarsinnaaneq Naalakkersuisutigut pinissaa tulluarnerummat.

Siumumiit taamaattumik periarfissiissuteqartoqarniarnera ilumut pisariaqartinneqarnerasoq apeqquserparput, Nunat Avannarliit Siunnersuisoqatigiivini periarfissaq taamaattoq annertunerusumik atorneqanngitsoq ilisimagatsigu. Nunat Avannarliit Killiit Siunnersuisoqatigiiffianni atorneqarsinnaanngortinneqarsinnaanera pillugu Ataatsimiititaliami nalilersugassanngorlugi suliasanngortinnissaa innersuussutigaarput, nalilersuinissamilu Nunat Avannarliit Siunnersuisoqatigiiffianni misilittakkat qulaajarneqarnissaat kissaatigalutigu.

Taamatut oqaaseqarluta siunnersuutip Siulittaasoqarfimmi aappassaaneerneqartinnagu suliarineqarnissaa inassutigaarput.

Anders Olsen  
Siumut